

TEZAU LITURGIC
3 FEBRUARIE

ACATISTUL
SF. PREOT-MUCENIC
ALEXANDRU
DE LA
NIKOLSK



MOSCOVA, 2000



Акафист

священномученику

Александру Никольскому

Кондак 1

Избранный угодниче Христов и страстотерпче священномучениче Александре, в годину гонений лютых душу свою за Христа и Церковь Его положивый и к сонму новомучеников российских сопричтенный, помяни нас во святых твоих молитвах ко Пресвятой Троице, да зовем ти:

Радуйся, священномучениче Александре, теплый молитвенниче о спасении нашем!

Икос 1

Ангелов Творец и всея твари Создатель во дни смут и нестроений церковных избра ты, святе Александре, в проповедника Православия среди народа от веры отступавшего Ты же, яко добрый воин Христов, Креста оружием вооруженный, со усердием провозвещал еси учение Спасителя Нашего, за Него же многия страдания смиренне претерпевши, венцем мученическим украсился еси на небесех, идеже молишися о всех, взывающих ти сице:

Радуйся, всем сердцем и всем помышлением твоим Бога возлюбивый;
Радуйся, за веру и Отечество живот свой положивый;
Радуйся, царствия Христова сонаследниче;
Радуйся, славы Божия сопричастниче;
Радуйся, Спасителя возлюбивших покровителю;
Радуйся, кающихся с Богом примирителю;
Радуйся, чтущих память твою пред Богом поминающий;
Радуйся, о прославляющих тя Господа умоляющий;
Радуйся, священномучениче Александре, теплый молитвениче о душах наших!

Кондак 2

Видящие благочестивыя родители твоя,
протоиерей Матфей и матушка Людмила чадо
свое благочестием и богомыслием с детства
Всевышним одаренное и крепкою любовью к
Христовой Церкви озаренное, в радости
духовней воспевали о тебе Господеви: Аллилуйа!

Икос 2

Разумом свыше просвещаемь, угодниче Христов,
житие добродетельное возлюбил еси;
богобоязненным родителям твоим внимая, во
страхе Божии и благочестии возрастал еси; к

молитве и чтению книг священных навык еси,
и во трудах твоих образ будущего
добродетельного жития явил еси. Мы же,
дивящееся таковому от юности твоея усердию
вопием ти сице:

Радуйся, рода честного отрасли благородная!

Радуйся, лозо винограда Христова
многоплодная!

Радуйся, чадо молитвы родителей
благочестивых!

Радуйся, надеждо и утешение сердец их
боголюбивых!

Радуйся, от малых лет сладость молитвы
вкусивый!

Радуйся, Божественное Писание возлюбивый;

Радуйся, от юности служить Христу
возжелавый;

Радуйся, нелецемерную по Бозе ревность
показавый;

Радуйся, священномучениче Александре, теплый
молитвенниче о душах наших!

Кондак 3

Сила Христова осени тя, преславне Александре,
и дарова ти крепость мужественнее претерпети
искушения врага невидимаго, его же стрелы
разженные угасил еси твоими слезными к Богу
молитвами; сего ради, яко победитель,

воспеваеши с безплотными силами песнь
победную Христу Богу: Аллилуйя!

Икос 3

Имуще Премилосердный Господь Наш велия
попечение о тебе, прехвальне Александре,
благодатию. Своею укрепи ты со дней юности
твоя, ты бо начаток и конец жития твоего на
камене благом Христе – Спасителе положил еси;
Ему же последующе вся красна мира сего
презревше, страдание прескорбное Его же ради
претерпел еси, и ныне во чертозах небесных
радуешься и веселишися о Бозе Спасе Твоем.
Мы же, вся сия поминающее, таковые величаем
ты сице:

Радуйся, Духом Святым просвещенный!

Радуйся, соблазнами мира сего не прельщенный!

Радуйся, заповеди Христовы в сердце твоём
сохранивый!

Радуйся, Пречистую Матерь Его зело
возлюбивший!

Радуйся, молитвы твоя к Ней неустанно
возносиый!

Радуйся, честь и похвалу святым угодникам
праведно воздаваый!

Радуйся, благим супружеством своим и нам
образ брака честнаго явивый;

Радуйся, в супружнице твоей добраго

помощника на пути Христовом обретый;
Радуйся, священномучениче Александре, теплый
молитвенниче о душах наших!

Кондак 4

Буря искушений и устремлений бесовстих и
волны соблазнов мирских не возмогоша
поколебати храмины твоея душевныя, святой
Александре, основана бо бе на твердом камене
веры во Христа и хранима трезвлением,
трудами и молитвы твоима богоприятными; ты
бо на Единого Спасителя уповая, умиленным
сердцем воспевал еси Ему: Аллилуйя!

Икос 4

Слышавше, святой Александре, глаголы
Спасителя нашего, яко «жатва убо многа,
делателей же мало» (Лк 10:2), сему поревновал
еси, и, егда сан священный прияти сподобился
еси; со усердием провозвещал еси учение
Христово; сего ради твоя пастырские
добродетели хваляще тя, Боголюбче, ублажаем и
на предстательство твое уповая, вопием ти
сице:

Радуйся, священство, яко великий дар
Господень, восприявый;
Радуйся, обильно в хиротонии благословение
небесное стяжавый;

Радуйся, Жертву безкровную со страхом и
трепетом совершавый;
Радуйся, словом мудрым всех приходящих к
тебе питавай;
Радуйся, помраченные умы наша
просвещающий;
Радуйся, окаменелыя сердца наша
оживляющий;
Радуйся, Бога любить и волю Его творить нас
научающий;
Радуйся, в радости Творца благодарить нас
побуждающий;
Радуйся, священномучениче Александре, теплый
молитвенник о спасении нашем!

Кондак 5

Боготечней звезде уподобился еси,
священномучениче Александре, многих бо к
Солнцу Правды Христу путеводил еси словом
твоим премудрым и примером преславного
жития твоего, еже посвящено бысть Богу и
ближним твоим. Тем же блаженство вечное со
всеми святыми унаследовал еси и с ними же
(предстоя престолу святых Троицы) пение
хвалебное воспеваеши: Аллилуйя!

Икос 5

Видяще, яко властителие богоборныя возвигоша
супротив христиан православных гонение

лютое, не престал еси молитися,
священномучениче Александре, да укрепит тя
Всемудрый Господь за веру правую даже до
смерти стояти; паству же твою наставлял еси
благодатию Божественной в таинствах
укреплятися и от матери – Церкви никакоже не
отхождати. Сего ради величающее тя, добрый
воине Христов, таковыя похвалы приносим ти:
Радуйся, Христова стада пастырю верный;
Радуйся, носителю духа кротости
добропобедный;
Радуйся, правды и истины паче всего в житии
твоем искавый;
Радуйся, проповеди Слова Божьего николиже
оставлявый;
Радуйся, всех нас к покаянию ныне
призывающий;
Радуйся, на милость Божию уповати нас
подвизающий;
Радуйся, от плевел ненависти сердца наша
очищающий;
Радуйся, светом любви нелицемерныя нас
озаряющий;
Радуйся, священномучениче Александре, теплый
молитвенниче о спасении нашем!

Кондак 6

Проповедник веры Христовой и ревнитель благочестия не словом токмо, но и всем житием твоим был еси, всехвальный священномучениче Александре; тем же и Церковь Святая достойно почитает подвиги, труды и страдания твоя, иже Спасителя ради подъял еси, немолчно Господеви воспевая: Аллилуйя!

Икос 6

Воссиял еси, яко светило незаходимое, горением веры и чистотою души твоея в земли Брянстей, идеже Пастыреначальник Господь поставил тя пасти овец Его, имже ты воистину был еси правилом жития благочестиваго и, яко наставник богомудрый, в вере Православной паству твою утвердил еси, образ пастыря добраго (аки память благу и драгоценную) оставил еси нам, приносящим ти благохваления сия:

Радуйся, духовных чад богомудрое окормление;
Радуйся, паствы твоея отрадное утешение;
Радуйся, в годину бед и испытаний отеческою любовью всех утешавый;
Радуйся, к благодатной и благомошной защите Спасителя прибегати паству твою научавый;
Радуйся, чад наших от соблазнов мира соблюдая;

Радуйся, оных в целомудрии и чистоте
укрепляя;
Радуйся, скорби наша в радость претворяющий;
Радуйся, светом надежды Христовой нас
озаряющий;
Радуйся, священномучениче Александре, теплый
молитвенниче о спасении нашем!

Кондак 7

Хотяще веру Православную в веси Речица
утвердити, святой отче наш Александре, крест
Христов с кротостью восприял еси, укрепляя чад
твоих духовных в добродетелех христианских;
смирении, кротости, любви к Богу и ближнему.
Мы же, ныне молим тя, угодниче Христов,
предстательством твоим испроси и нам сия
боголюбезные добродетели; да не поработимся
страстем греховным, но чистым сердцем
воспоем Спасителю Нашему: Аллилуйя!

Икос 7

Новые труды и подвиги ко устроению жизни
Христианской в земли Брянстей подъял еси,
новомучениче Александре, чад твоих духовных
на усердное служение Христу Богу и исполнение,
заповедей Его подвизая (и был еси има
наставник благодатный и праведный). Тогда
возвигоша властиие богоборческия гонение,
супротив тя, дабы отвратити тя от трудов сих;

ты же благодатию свыше укрепленный, верен
Господу даже до смерти пребыл еси. Мы же,
ныне память твою славим и взываем ти сице:
Радуйся, пастырю добрый, душу свою положить
за словесных овец готовый;
Радуйся, о потерянных овцах зело скорбевый;
Радуйся, никогоже от приходящих ти
отвергавый;
Радуйся, любвию твоею вся покрывавый;
Радуйся, о укреплении веры во чадах своих ко
Господу взывавый;
Радуйся, образ истинного служения Христу
явивый;
Радуйся, светом Божиим от растления нас
охраняющий;
Радуйся, в вере и верности Богу нас
утверждающий;
Радуйся, священномучениче Александре, теплый
молитвенниче о душах наших!

Кондак 8

Странно бысть людям маловерным видети
пречудное житие твое, святой Александре, яко
не о славе си, ни о мимотекущих и преходящих
благах земных помышляя еси; егда нечестивых
советы, о еже оставить ти служение твое
пастырское отверг еси. Мы же, благочестие и
мудрость воспевающее, Всеблагого Господа

Нашего, умудрившего тако тя, славим вопиюще
Ему о тебе: Аллилуйя!

Икос 8

Всего себе Господу предал еси, святой
новомучениче Александре, егда взяша тя
нечестиви и в темницу ввергоша. Ты вслед
апостолу помышлял еси «аще бо живем,
Господеви живем, аще бо умираем, Господеви
умираем» (Рим. 14:8); благодатию Христовой
укрепляемь путь страданий добропобедно
прошел еси. Мы же, воспоминающее о подвигах
твоих, восписуем ти хваления сия:

Радуйся, яко неблагомысленных наветы
претерпел еси;

Радуйся, яко от яростных поношения приял еси;

Радуйся, неправедный приговор с кротостью
приявый;

Радуйся, крилами богомыслия сети вражия
сокрушивый;

Радуйся, злобные умышления того доброславно
посрамивый;

Радуйся, заповедь Христову о любви ко врагом
исполнивый;

Радуйся, прощати и благословляти ближних нас
научающий;

Радуйся, в кротости и смирении нас
укрепляющий;

Радуйся, священномучениче Александре, теплый молитвенниче о душах наших!

Кондак 9

Вся помыслы и все упование на Спасителя
Нашего возложил еси, страстотерпче
Александре, егда во узах темничных суще, от
гонителей веры Православия оскорбления,
надругания, заушения и биения незлоблively
приял еси, молящее Всеблагаго Христа о
даровании ти в муках терпения и во страдания
– укрепления. Мы же, Господа Нашего,
озарившего тя светом своим во дни испытаний
твоих, славим и вопием Ему: Аллилуйя!

Икос 9

Вития многовещанные не довлеют по достоянию
восхвалити праведное житие и мученическую
кончину твою, всехвальне Александре; обаче же
мы, любовь к тебе подвигаемы и надеждою на
предстательство твое окрыляемы, со смирением
и верою таковые похвалы приносим ти:

Радуйся, венец терновый на земли благочестно
носивый;

Радуйся, венец нетленный на небеси от Господа
получивый;

Радуйся, нужды наша ко Престолу Божию
возносящий;

Радуйся, отраду и утешение нам

ниспосылающий;
Радуйся, от глада духовнаго всех нас
избавляющий;
Радуйся, грешников ко исправлению
направляющий;
Радуйся, суетную славу мира сего презирати нас
научающий;
Радуйся, светом радости души наша
озаряющий;
Радуйся, священномучениче Александре, теплый
молитвенниче о душах наших!

Кондак 10

Спасение и славы вечныя достигл еси, святой
новомучениче Александре, егда верности Христу
ради претерпел еси страдания лютыя и смерть
мученическую. Мы же, память твою святую,
благоговейно чтуще, просим тя, угодниче
Христов, избавити ны от скорбей, бед и
напастей, исцелити недуги наши духовныя и
телесныя, да и с тобою Благодеющему нам
Господу смиренне воспеваем: Аллилуйя!

Икос 10

Стена крепкая, козньми врага неодоленная
пребыл еси до конца, всехвальный
священномучениче Александре, егда злочествию
богоотступницы (во граде Брянске) лютой

смерти ты предаша. Тем же мы, благоговейно поминающее страдания твоя и подвиги твоя, с любовью зовем ти:

Радуйся, последователю верный распятого Учителя;

Радуйся, споспешниче усердный ада Разрушителя;

Радуйся, пастырю, за Христову веру пострадавый;

Радуйся, не убоявшийся убивающих тело, душу же свою не погубивый;

Радуйся, ум и сердце посреди мучения горького ко Господу устремивый;

Радуйся, ризы твоя в крови Агнца убеливый;

Радуйся, пренесением мук лютых тленная на нетленная пременивый;

Радуйся, благодать молитвы о нас от Творца получивый;

Радуйся, священномучениче Александре, теплый молитвенниче о душах наших!

Кондак 11

Пение наше всякое побеждается, и многое множество хвалебных песен, воспеваемых ти, несть довольно, дабы по достоянию восхвалити тя, священномучениче Александре; обаче молитвами твоими получающее от Христа Бога благодения многообразныя, благодарни сущи,

поем о тебе Ему: Аллилуйя!

Икос 11

Света нетварнаго зритель и радости
Божественный причастник явиися еси,
новомучениче Александре, тем же молим тя: не
престани молиться о нас (купно со всеми
новомученики росийстими), да помилует нас
Господь твоего предстательства ради и сподобит
нас, немощных, новую силу нечестия посрамить
и победителей злонравия явиться, да ублажаем
тя сицевыми похвалами:

Радуйся, в неизреченной славе Творца мира
созерцающий!

Радуйся, во благоухании святыни присно
почивающий!

Радуйся, от райских обителей в юдолю
плачевную низходящий;

Радуйся, молитвы наша к стопам Вседержителя
возносящий;

Радуйся, труды наша на пути спасения
облекающий;

Радуйся, тайно творить добродетели нас
научающий;

Радуйся, от обычаев душевных сердца наша
отвращающий;

Радуйся, нравы добрые и благочестие в нас
насаждающий;

Радуйся, священномучениче Александре, теплый молитвениче о спасении нашем!

Кондак 12

Благодать Божию обильно приял еси, священномучениче Александре, еюже укрепися сердце твою в любви ко Христу Богу Нашему; сице бо долготерпением и верою просиявше, мученически житие твое скончавше, со лики ангельскими водворился еси в чертозах Отца Небеснаго. Ему же со дерзновением предстоя, молися тепле, о еже благодатию Всесвятаго Духа укрепиться и нам, грешным, о тебе, Господеви, поющим: Аллилуйя!

Икос 12

Поющи преславныя подвиги твоя и величая добропобедныя страдания твоя, восхваляем неизреченное благоволение Божие на нас свершившееся. Тя бо, благага и вернаго раба Своего, Всеблагий наш Спаситель во утешение и утверждение веры нам дарова, да уразумем, яко щедр и милостив Господь, в род и род Помощник и Защититель нам будет: избавит очи наша от слез, нози от поползновений лукавых и всех нас от всяческих скорбей житейских и твоего предстательства ради услышит нас и спасения вечнаго удостоит. О сем же

воздыхающе, тебе, всехвальне Александре,
таковыя похвалы приносим:
Радуйся, мучеников пречестных неувядаемое
украшение;
Радуйся, верных в терпении непоколебимое
утверждение;
Радуйся, ходити в заповедех Божиих нас
наставляющий;
Радуйся, друг друга тяготы носить нас
подвизающий;
Радуйся, от сетей вражиих чтущих тя
избавляющий;
Радуйся, от заблуждений духовных нас
исцеляющий;
Радуйся, за вся Творца благодарити нас
научающий;
Радуйся, милосердие Божие к нам
приклоняющий;
Радуйся, священномучениче Александре, теплый
молитвенниче о спасении нашем!

Кондак 13

О страдальче многосветлый и служителю
Христов Александре! Приими малое хваление
сие в простоте сердечной тебе возносимое.
Вонми гласу недостойному молящихся тебе и
твоими скорыми ко Господу прошениями, умоли
Его пробавити благоутробие Свое на ны, да

сподобимся в радости блаженней купно с тобою
воспевати Ему (ангельскую песнь): Аллилуйя!
Сей кодак читается трижды, затем – паки Икос
1 и кондак 1;

